



Turitg, ils 9 da december 2020  
**Communicaziun a las medias**

**Pernottar favuraivel e sfunsar cumadaivlamain en la quarta lingua naziunala:  
La Quarta Lingua sustegna in project dals Albierts da giuventetgna  
svizzers cun 10'000 francs che sustegna il barat cultural**

La contribuziun d'emprima prioritad 2020 da l'uniun da promoziun Quarta Lingua (QL) è attribuida. Ils 10'000 francs van als Albierts da giuventetgna svizzers. En la runda finala cun trais projects extraordinaris è la «Sutga Rumantscha» stada buna da correspunder il meglier als criteris da la concorrenza.

Ord vista da la QL transmitta la pultruna multimediala a moda nunspetgada la lavur culturala rumantscha multifaria. Ella pussibilitescha a persunas che na discurran betg rumantsch da «sfunsar» cumadaivlamain en ina lingua viventa cun lungas ragischs. Il project dals Albierts da giuventetgna svizzers ha er persvadì la suprastanza da la QL, perquai ch'el pussibilitescha a moda termaglianta in'emprima avischinaziun al rumantsch.

La surdada dal premi ha lieu en il rom da la preschentaziun da l'emprima «Sutga Rumantscha» als 3 da favrer en il wellnessHostel3000. L'edifizi modern cun bogn cuvert han ils Albierts da giuventetgna svizzers realisà cuminaivlamain cun la vischianza da Laax. Il nov albiert da giuventetgna en Surselva avra sias portas gia avant Nadal.

Cun la surdada da questa contribuziun d'emprima prioritad turna la QL, ch'è vegnida fundada l'onn 1972 e sa finanziescha exclusivamain tras commembers e donaturs, tar il modus da promoziun usità. Infurmaziuns davart ils projects ch'èn vegnids sustegnids fin ussa, ils criteris e las formalitads d'inoltraziun dat la pagina d'internet bilingua [www.quartalingua.ch](http://www.quartalingua.ch).

Petra Camathias, presidenta da la QL  
pcamathias@hotmail.com

Per ulteriuras infurmaziuns davart l'albiert da giuventetgna a Laax e davart «La sutga rumantscha» p.pl. sa drizzar a André Eisele, manader da marketing e communicaziun dals Albierts da giuventetgna svizzers:  
andre.eisele@youthhostel.ch